

U okviru komentara na dobivene odgovore, **Azra Hadžiahmetović** ponovila je pitanje *Vladi Federacije BiH*: „Poslaničko pitanje odnosi se na proces naplate potraživanja iračkog duga za projekat Hadihta na čijoj realizaciji je bila angažirana sarajevska Hidrogradnja. Potraživanja su od Iraka odobrena i naplaćena od tada već ugovorenog administriranja naplate posredstvom JUBMES-a iz Beograda i na čijem računu se već nalaze obveznice u vrijednosti od 26,7 miliona dolara. Zbog potpune isključenosti ili nezainteresiranosti državnih institucija u procesu realizacije ovih potraživanja, entitetske vlade su, kako su izvijestili mediji nedavno, postigle sporazum o raspodjeli sredstava između Hidrogradnje i Investiciono-razvojne banke RS-a koja upravlja imovinom Hidrogradnje Istočno Sarajevo, osnovane 1992. godine (dakle, nakon što je posao na navedenom projektu okončan).

U tom kontekstu postavljam sljedeća pitanja:

1. Koji je pravni osnov da Vijeće ministara BiH, posebno Ministarstvo vanjske trgovine i ekonomskih odnosa BiH i Ministarstvo finansija i trezora BiH, ne učestvuju u procesu naplate ovih potraživanja?
2. Kako su i po kojem osnovu entitetske vlade dogovorile strukturu raspodjele sredstava u vrijednosti od 26,7 miliona dolara?
3. Da li je ovaj sporazum realiziran i ako nije, zašto nije?
4. Kakva je sudbina ranije postignutog dogovora o sporazumnoj rješavanju pitanja naplate ovih potraživanja?
5. Da li je tačno da, pored ova dva pomenuta modaliteta naplate potraživanja, postoji i aranžman s posredničkom firmom iz Beograda kojoj su data ovlaštenja da potpiše naloge za plaćanje i ako je to tačno, koja je cijena tog angažmana? Kakva je sudbina tog dogovora u kontekstu sporazuma dvije entitetske vlade i kakve i kolike obaveze postoje prema posredničkoj firmi?
6. Špekulira se i o obavezama koje iz realizacije ovog projekta proizilaze i po jednu firmu iz Republike Hrvatske. Ko će, na koji način i iz kojih sredstava izmiriti ova dugovanja?
7. Koliko će eventualno dalje prolongiranje naplate ovih potraživanja stvoriti dodatnih obaveza i može li se desiti da sarajevska Hidrogradnja postane obveznik po iračkom dugu?
8. Ko je odgovoran za ogromne gubitke koji su nastali prolongiranjem ove naplate i da li će zbog toga neko snositi posljedice i kakve?“